

## ❖ PAN ENIR BABAN

Buom grintachlyd a garw a phawb drosto'i hun  
 Heb feddwl am rannu na byw yn gytûn;  
 Anwadal, anonest, annuwiol ein bryd –  
 Hyn oedd ein rhan cyn cael baban i'r byd.

Chwiliasom am emau, a methu eu cael,  
 Bu chwilio am aur ond ddi siom yn ddi-ffael;  
 Chwilio am gyfoeth o hyd ac o hyd –  
 Chwilio'n ddibwrpas cyn cael baban i'n byd.

'A chwi a gewch y dyn bach wedi ei rwymo mewn cadachau a'i ddodi yn y preseb.'  
 'Wele ganwyd i chwi heddiw yn nhref Dafydd waredwr, yr hwn yw'r Meseia.'  
 'A chawsant hyd i Fair a Joseff, a'r BABAN.'

Weli di'r golau fry yn y ne'  
 A llewyrch seren yn llenwi'r lle?  
 Ar erwau y tir daw gwawr dros y crud –  
 Hyn fydd ein rhan pan ddaw baban i'r byd.

Daw awelon mwyn dros donnau'r lli,  
 A gobeithion syn i'r tlawd a'i gri,  
 Ac fe chwâl amheuon gofidiau mud –  
 Hyn fydd ein rhan pan ddaw baban i'r byd.

Daw lliwiau pur i lonni'r ardd,  
 A ninnau'n rhannu'r holl wyrthiau hardd;  
 Heb undyn am ennyd yn drist ei fryd –  
 Hyn fydd ein rhan pan ddaw baban i'r byd.

Ac fe ddigwydd hyn oherwydd bod y byd yn disgwyl, yn disgwyl am un baban a fydd yn tyfu ac yn troi  
 dagrau yn chwerthin, casineb yn gariad, rhyfel yn heddwch, a phawb yn gymydog i bawb arall, a bydd  
 tristwch a dioddef yn eiriau i'w anghofio am byth.

Os breuddwyd yw – rhyw ddymuniad pell –  
 Rhaid iddo fod i greu byd fydd well.  
 Ar erwau y tir daw gwawr uwch y crud,  
 Hyn yw ein rhan. Fe ddaeth Iesu i'n byd.

**Tecwyn Owen**